

Kajian menyeluruh tamadun Melayu penting membina budaya bangsa

UM 12 NOV 1986

KUALA LUMPUR 11 Nov. — Usaha-usaha pengkajian mengenai kebudayaan dan tamadun Melayu dengan lebih rapi dan menyeluruh adalah amat penting dalam pembinaan dan pembangunan budaya bangsa, kata Datuk Sri Dr. Mahathir Mohamad hari ini.

Perdana Menteri percaya hasil kajian itu akan dapat mendedah dan mengengahkan kepada masyarakat akan ketinggian falsafah dan pemikiran rakyat asal rantau ini yang telah memungkinkan satu kebudayaan dan tamadun yang agung.

“Secara ini rasa bangga akan sentiasa tertanam dan ianya akan mengukuhkan lagi keinginan kita membina tamadun bangsa di zaman ini pula.

“Sifat rendah diri akan terkikis dan akan berganti dengan satu jiwa baru yang kuat dan kukuh yang sentiasa memandang ke arah kemajuan masa depan bangsa yang gemilang,” ujarnya dalam perutusannya sempena Persidangan Antarabangsa mengenai Tamadun Melayu selama tiga hari yang bermula di sini hari ini.

Datuk Sri Dr. Mahathir menjelaskan hasrat untuk mencapai cita-cita itu bukanlah sesuatu yang mudah tanpa usaha-usaha yang gigih dan penglibatan serta kerjasama dari semua pihak terutama dari kalangan para sarjana dan pengkaji tempatan dan luar negeri.

Beliau menyifatkan persidangan antarabangsa yang sedang berlangsung sekarang merupakan satu landasan yang amat sesuai ke arah itu dan sebagai satu pembuka jalan awal bagi mengembalikan keagungan tradisi ilmu dan kegemilangan budaya tinggi tamadun Melayu.

Menteri Kebudayaan, Belia dan Sukan, Datuk Najib Tun Razak pula dalam perutusannya berharap satu perancangan induk yang benar-benar rapi untuk memungkinkan pengkajian yang lebih sistematik dan terarah dapat dibuat dalam semua bidang pengajian tamadun Melayu.

Beliau mengalu-alukan penggunaan bahasa Melayu sepenuhnya dalam persidangan kali ini dan yakin bahasa Melayu dapat maju setapak lagi ke hadapan dan dapat dipertuturkan di persidangan yang bertaraf antarabangsa.